

ses creatures quand bon luy semble, il est misericordieux enuers ceux qui se repentent de leurs pechez, & ayme ceux qui le seruent. Il a creé son Trosne auquel loüange est eternellement deüe, il esleue qui bon luy semble, & rien ne luy est impossible. As-tu ouï l'histoire des gens de Pharaon & de Temod? Dieu chastiera de mesme façon ceux qui ne croiront pas en sa loy, il les cognoit tous. Certainement l'Alcoran precieux est escrit dans le liure qui est gardé au Ciel.

*LE CHAPITRE DE L'ESTOILE,  
ou de la Tramontane, contenant dix-sept  
versets, escrit à la Meque.*

**A**V nom de Dieu clement & misericordieux. Je iure par le Ciel & par l'Estoile qui enseigne le chemin aux hommes. Je ne te diray pas par quelle Estoile, par l'Estoile pleine de clairté, que chaque personne à vn gardien ( qui obserue le bien & le mal qu'elle fait. ) L'homme ne considere-t'il pas de quoy il est cree? Il est creé d'un peu d'eau respandüe, qui sort du corps de l'homme & de la femme; Dieu le fera ressusciter au iour du Iugement & personne ne le pourra proteger ny deffendre de la colere de sa diuine Majesté. Je iure par le Ciel qui renuoye la pluye, par la terre qui s'ouure & la reçoit pour produire ses fruiçts, quel'Alcoran distingue le bien d'auec le mal,

& qu'il n'a pas esté enuoyé inutilement. Les infidelles conspirent contre le Prophete, mais Dieu fera tourner leur conspiration contre-eux, & ne le cognoistront pas. Patiente & tolere vn peu de temps les infidelles.

---

## LE CHAPITRE DV HAVLT

*Et Puissant, contenant dix-sept versets,  
escrit à la Meque.*

**A**V nom de Dieu clement & misericordieux. Exalte le nom de ton Seigneur hault & puissant, qui a proportionné tout ce qu'il a creé, il ordonne ce qu'il veut & conduit au droit chemin ceux qui luy sont agreable, il fait sortir les herbes de la terre, il les crée vertes, il les rend seiches, & les altere comme bon luy semble. Iete liray l'Alcoran, n'oublie de ce que tu liras que ce que Dieu voudra que tu en oublie, il sçait tout ce qui est tenu secret dedans le monde & tout ce qui est mis en euidence. Ie t'enseigneray la loi, presche l'Alcoran il profitera à celuy qui aura la crainte de Dieu deuant les yeux, ceux qui le mespriseront seront mal heureux, ils seront precipitez dans le feu d'Enfer où ils ne pourront ny viure ny mourir, & celuy qui embrassera la loy de Dieu, & qui se souuendra de son nom sera bien-heureux. Prie Dieu au temps ordonné. Certainement les gens de bien se